



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma : Tir Yimym

tiryimym@aolima

tir yimym

TAPAK 7

UEFA tir mapa abentsü Aleksander
Ceferin tanaben shimogo

United States molumi leni
aor: Donald Trump



VOL. XX NO. 174 (ADOK 174) DIMAPUR YANGTEPNÜ (THURSDAY)

RONGCHII (APRIL) 06, 2023

₹ 5.00

Nagaland nung teinyaktsü wadang jenti lir: CM Rio

Kohima, April 5, 2023 (TYO): Nagaland nung ali rongsen jenti lir aser mezüing arurtem asoshi tajangzük asütsü ta Chief Minister Neiphiu Rio-i B20 session nung jembidang ashi.

"Nagaland indang rongsenketzüng ya agriculture & allied activities tuluba lir aser nütsüng yongsük 70% tashi iba nung amendaka lir. Nagaland nung tsünusenbongtsü ya mozü medeni dang tsünür kechiyong aluyimertemi natural manure aser alemli nungi benshia aruba inyakyim dang benshir" ta CM Rio-i ashi.

Nagaland nung nütsüng yongsük ajema lir aser square km shia nisung 119 dang atar. Iba ajanga land-man ratio tajung lir aser tsünusenbongtsü atema tsüingsang-mopung tapet lir, ta paisa ashi.

Nagaland nung tsünütetba rongnung alima nung mersü tashitiba Naga chilli dena lir. Ano süngjanglijang aika tsünür aser item tajitsüji kana tajung lir aser iba jagi kanga junga yokteter. Ano tanü putu tsünüba cash crops-coffee aser tea kanga junga tsünüteter" ta CM Rio-isa

metetdaktüsü.

'Naturally Nagaland' ta ser Nagaland nung tsünütetba chiyungtsütem aser osettsüsettem ayokba sabang ka lir. Ano, agriculture aser allied sectors indang mapa inyaktsü lenmang aika sadema lir anungji B20 session nung adeni arurtemi item lenmangtem asadangtsü ayongzükür ta paisa ashi.

Nagaland nung tourism industry renloka aotsü lenmang sadema lir. Nagaland alima tobur ajung balaka aser tourist paradise ka lir, ta CM Rio-i ashi.

"Maneni, Nagaland nungsa Handloom and handicrafts, Sports and Youth Development, Animal Husbandry & livestock rearing, Medicinal and Aromatic Plants, Higher Education, Healthcare, aser Logistics amala wadang balala nung mapa inyaktsü lenmangtem lir" ta paisa shisem.

"Tesüiba mapangtem Nagaland nung industry mapa meinyakba ajanga mebushiba alima rongsen jenti lir aser iba ajanga mezüing arua inyakertem asoshi maongka talubosa lir" ta Rio-isa ashi.

Loktii GMS Phezoucha atema mapa tajung inyak

Kohima, April 5, 2023 (TYO): School Education and SCERT Advisor Dr Kekhrielhoulie Yhome-i Mongulbarnü Government Middle School (GMS), Phezoucha, New Secretariat area, L. Khel Kohima village nung classrooms ana sülokba aser school ki yanglushiba lapoktsüogo.

Classroom takdang ana sülokba aser GMS building yanglushiba ya community funded project ka lir aser temeimertem, arogo, colony züngsemtem aser tesayur 17-i mulungsoa Rs 8.25 lakh tenlaba ajanga iba mapa inyaktet. Iba maparen ya School Management Committee (SMC)-i sorkar nungi senotsü teyari mataidang inyak.

Iba school nung kaketshir students 176 (tetsür 91 & tebur 85) den tesayur 17 lir.

"School education department-i state ajungalen sorkar school 1,939 nung teinyaktsü aika meinyak lir. Nisung ajaki yaritepa department-i state nung sorkar school tem jenjang meyipa reprangshitsü imlar" ta Advisor Yhome-i ashi.

Nagaland nung school aika lir saka GMS Phezoucha nung loktii nungita yariba ama teyari mangur. Head Teacher Supeno Mozhui lenisüba atema pelar, ta paisa ashi.

"Tanü nisung ajaki shisaliok jangrar aser sorkar school tem

nung tesayur tajungtibatem lir. Anungji sorkari quality education agütsütsü tebilemsü khuret bona inyaktsü. School ka renloka aotsü atema bendanga agütsüba telok ka nüngdaker. GMS Phezoucha nung school tesayurtem, SMC aser public-i yaritepa atema pelar" ta Advisor Yhome-isa metetdaktüsü.

Bendanger aikati Corporate Social Responsibility (CSR) ajanga Nagaland dak tenük yoker aser iba atema School Education department-i yakta CSR cell ka lapoktsü ta paisa ashi.

"Iba school ya 2005 küm lapok aser 2011 nung best performing GPS angu. 2021 nung GMS jenjang nung ajungket anungji class rooms talila nüngdaka aküm. SMC-i mezüingbo department nungi senotsü teyari meshi saka ibaji mekümtet aji agi local funding mapa inyaktsü lemtet" ta SMC chairman Dr Ketshukietuo Dzüvichü-i ashi.

"Tan academic session nungi Class 7 aser 8 lapok saka class room peria maliba agi nisung aika admission mesütet" ta pai ashi.

Iba sentong nung Commissioner & Secretary Kevileno Angami, Mission Director Samagra Shiksha Tamsunaro Aier, Principal Director Thavasaleen K, Director Wanthungo Tsopoe aser Joint Mission Director Samagra Dr Kevizakie Rio nungren aden.

Nagaland nung B20 conference session agiogo



April 5, 2023 nü State Banquet Hall, Kohima nung B20 Conference indang Plenary Session nung Ambassador/Country Representatives aser o jembirtem külemi agiba noksa ka angur.

Kohima, April 5, 2023 (TYO): North East nung B20 Conference pezübuba aser tatembangba Nagaland yimtiba Kohima nung Bodbarnü agiogo.

Iba sentong ya Multilateral Partnerships in Agriculture, Food Processing, Tourism and Information Technology nung ajemdaker agi.

Business 20 (B20) ta asüba ya Group of Twenty (G20) nung private sector indang telok ka lir. Northeast nung taoba B20 sentongtemji Manipur, Sikkim aser Mizoram nung agiogo.

Linük 27 nungi teshimtet nübo 60, overseas industries 39 aser diplomats 24 tashi tanü Kohima sentong nung aden. Iba sentong ya Ministry of External Affairs indang G20 Secretariat kübok Confederation of Indian Industry (CII) ajanga ketdangtsüa agir aser Nagaland sorkari yariteper.

Tanü Argentina, Australia, Bangladesh, Bhutan, Canada, China, Costa Rica, Cote D'Ivoire, Cuba, Estonia, Germany, Iceland, Indonesia, Ireland, Italy, Jamaica, Japan, Nepal, Nigeria, Panama, Paraguay, Romania, Russia, South Africa, Srilanka, Turkiye, United Kingdom aser United States nungi teshimtet nübotem aden. Parnok dak alia Cuba, Iceland, Jamaica, Paraguay o Panama nungi Ambassador 5, Estonia nungi Deputy Head of Missions aser Costa Rica o Germany nungi Council General ana aden.

Maneni, B20 sentong nung Bhutan, Bangladesh, Iceland, Japan aser UAE nungi Focused Trade and Business teshimtet teloktem adener.

SC-i Nagaland ULB election atema 'stay order' agütsü

Kohima, April 5, 2023 (Agencies): Nagaland nung Urban Local Body (ULB) election athiba atema Supreme Court (SC)-i stay order ka agütsüogo.

Iba atema Supreme Court nung Nagaland state sorkar anema contempt petition ka benokogo ta osang angazükür.

Chief Minister nungi temelaba agia Election Commission-i Nagaland ULB elections athi ta

BJP high command nungi opposition maliba sorkar indang tetuyuba mali

Dimapur, April 5, 2023 (Agencies): BJP high command nungi Nagaland nung opposition maliba sorkar ka akümtsü tetuyuba kecha mali ta Tourism & Higher Education Minister aser BJP Nagaland president Temjen Imna Along-i ashi.

"Chief Minister Neiphiu Rio ya state nung aika ajangshia aruba

"Kohima nung B20 sentong ya mapang tajung ka nung amonger aser maongka anguba mapang ka lir. Kohima aser North East Region ya India nungi meta talang pilar lir saka East, ASEAN mesüra South Asian linüktem den India atema tiyongtsü tesem ka lir" ta Union Minister of State for External Affairs, Dr Rajkumar Ranjan Singh-i o jembidang ashi.

India-i G20 indang Presidency inyakba ya nüma atangba aser otsütsütsü mapang ka lir. Iba nung North East India ya kanga tongtipang lir kechiyong Prime Minister Narendra Modi-i North East dang "New Engine of Growth for India" ta ajar, ta Dr Rajkumar-isa ashi.

"Prime Minister's Development Initiative for North East Region (PM-DevINE) amala PM Modi-i mapatem inyakba ajanga sorkari North East renlokdaktüsü atema temulung agütsüba sayur" ta paisa ashi.

Tesüiba küm 8 tsüingda Northeast nung airports 9 aliba nungi 16 kümogo aser tayimtsü 1900 tashi senzür kechiyong 2014 nungbo 900 ben dang senzüa liasü, ta paisa shisem.

North Eastern state aika tang mezüing atema Indian Railway map nung denogo aser Centre sorkari waterways tuluba akümtsü meranger, ta ta Dr Rajkumar-isa metetdaktüsü.

"India atema Northeast ya Southeast Asia indang lenmang lir aser ASEAN tiyongtsü nung land connectivity alitsü. Iba ya India-Myanmar-Thailand trilateral highway renemba sülen ataloktsü. Anungji international business

community-i North East Region nung maongkatem bushidang iba ya temulung nung ayutsüla" ta pai ashi.

NE nung human resource base takar lir aser iba ajanga shishilembaba renloksü ta paisa G20 investors dang ashi.

"Nagaland nung horticultural and agricultural resources aika lir aser tourism and information technology kanga renloka aoe" ta CII Co-chairman Pradeep Bapla-isa ashi.

Nagaland-i 13,000 hectares tashi organic cultivation kübok dendaktüsü alizüng lir aser iba ajanga "Organic by default" nungi "organic by design" kümdaktüsü, ta pai ashi.

Nagaland nung tourist temi sapuba tesem aika lir aser sobaliba takar lir, ta paisa shisem.

"Nagaland state sorkari industrial and investment climate yaritsü atema policy aika yanglutsü sentong aliba atema tenüsang agütsür aser CII-ia policy yanglubu nung yariteptsü mulunga dang lir" ta Pradeep Bapla-isa ashi.

CII-i North East nung Agro Tech exposition, Medical Tourism conclave aser Franchise Show ayonga agütsü sentong lir, ta paisa shisem.

"Union Department for Promotion of Industry and Internal Trade (DPIIT) teyari ajanga CII-i August ita New Delhi nung North Eastern Region atema recommendation paper tajung ka agütsütsü tebilemba lir" ta Pradeep Bapla-i metetdaktüsü.

asir Justice Ahsanuddin Amanullah na dena lir aser tenati "elections athiba ya okadak mezüingmeshiba ama lir" ta metetdaktüsü.

March 14, 2023 nü SC-i tetuyuba agütsüba nung ULB election magira ibaji iba okadak tetuyuba sülen manidakba asütsü ta jangjangja shiogo ta SC bench-isa metetdaktüsü.

State sorkari inyakba mapaji magizükür ta Justice Kaul-isa ashi.

tashi kü dangi tetuyuba kecha maru. Onoki central leaders dang shiogo anungji tarutsü anogotem kechi lemtet agidir ata lidi" ta paisa ashi.

Mongulbarnü Kisama village nung Aoleang benjung amongba mapang Minister Imna Along-i osangbener den jembidang iba ya ashi.

"State President ka ama tanü

State nung nija mozüki ajak 'Tobacco Free Zone' sangdongogo



April 4, 2023 nü Commissioner & Secretary, H&FW, Y. Kikheto Sema, IAS aser Nagaland Private Practitioners Association den senden nung tangokba noksa nung angur.

Dimapur, Rongchii/April 05 (TYO): Commissioner & Secretary, Y. Kikheto Sema, IAS mendenpuba sür April 4, 2023 nü Nagaland Private Practitioners Association den senden amendang lemtetba ama April 11, 2023 nü nungi tenzüka State nung aliba nija mozüki ajunga 'TOBACCO FREE ZONE' sangdonger.

Department-ia state nung Government Hospitals/ Health Care, Health offices ajak 'TOBACCO FREE ZONE' ta February 1, 2023 nü sangdonga liasü.

COVID-19 anema raraba nung nija mozüki (private hospital) temi shilem tulu agiba bilemteta jembidang Kikheto-i sorkar tenüng nung nija mozüki temi health services balala nung sorkar den lungjemer inyakba atema pelaba lemsatepa liasü.

Pai nija mozüki tem dang tarutsü anogotem nunga külemi maneni inyaksü ayongzük aser department indang health information collection system nung shilem agia mapang shidak nung public aser private sector nungi health information

bendentsü ajungshi. Nüburtem nem jenjang talangba nung mozü tajung agütsütsü nükjidong nung Government of India-i Department of Pharmaceuticals kübok Pradhan Mantri Bharatiya Janaushadhi Pariyojana campaign tenzük, ta Kikheto Sema-i ashi.

Pai nija mozüki tem nunga item scheme amshia Pradhan Mantri Bharatiya Janaushadhi Pariyojana Kendra nungja agüja aliba special outlets tem nungi anguba generic medicines amshia, nüburtem aser talisa makamaiter healthcare nung sen indokba ajemdaksütsü ayongzük.

Commissioner & Secretary ajanga government doctor, nurses aser danga employee tem dang 'private practice' masütsü ayongzükba ama Nagaland Private Practitioners Association-ia Nagaland Health Care Establishment Act 1997 nung shia aliba ama Government mapa inyaktertem nija mozüki nung meinyakdaksütsü ashi.

Department-ia Act kübok

licences tem agizükba aser renewal maparen tekeraba nung inyaksütsü aser Policy on 'Ease of Doing Business' ajungkettsü asoshi mera ka ama online nung application agütsütsü atema Department-i portal ka yanglutsü aser tekeraba nung temelaba agütsütsü asoshi mozüki registration agitsü atema nungdakbatem ketdangsür den jembitsü, ta ashi.

Ayushman Bharat PM-JAY & Chief Minister's Health Insurance Scheme (CMHIS) dak sendakba nung Department-i health benefit package rate lepa reprangshiba mapang lir, koba ajanga State nung aser dangalen nija mozüki temi temolung süa mozüki tabu aikati nübur yaritettsü. Association-ia scheme anaprong nungi teyari agirtem nem service agütsütsü ashi.

Iba senden nung Nagaland Private Practitioners Association tir Dr. Victo Wotsa-i anir züngsemtem aser Department nungi Principal Director, Dr Vibeitunuo M. Sachu-i anir ketdangsürtem dena liasü.

NDPP ajanga Nagaland sorkar nem tenüngsang agütsür

Dimapur, Rongchii/April 05 (TYO): Chief Minister Neiphiu Rio-i aniba Nagaland sorkari April 4 & 5, 2023 anogotem G20 aser B20 Summit tem takok ngua ayongzükta asoshi tenüngsang agütsür, ta Nationalist Democratic Progressive Party (NDPP) sangdong ka ajanga ashi.

Iba ama linük balala nungi shilem agiba sentong tulu ayongzükba ya ajanga Nagaland ya alima nem metetdaksür alitsü aser iba ya ajanga tarutsü nung state aintsü aser renloksü asoshi tajangzük jenti angutsü.

Tanü tembangba sentong ya

Nagaland nungbo tang tashinung sentong tulutiba alitsü, aser state nem iba sentong ayongzüktsü asoshi maongka agütsüba yagi Nagaland ya tanü linük nung tongtipang tesem ka ta sayur, ta sangdong ajanga ashi.

Iba otsütsü aser lenmang lapokba alizüng ya puti otsü nung Nagaland asoshi takok tulutiba ama züngshitsü. Iba Summit ayongzükba ajanga alima dang brand Nagaland sayuogo aser iba yagi alima nung 'Naga soft power' temaba jenjangi ajungketba nung tongti shilem agitsü NDPP tamang teimla lir, ta ashi.

State dak tamang kaa iba ama alima tesem balala nungi arua shilem agiba sentong tulu ayongzüktsü maongka agütsüba atema NDPP ajanga ato kilonser aser Government of India dang kanga pelar.

Item sentong takok ngua ayongzükta ajanga state nung nübur dang sorkari "Nagaland - Towards a State of Excellence" yimyim kübok ozü motto "Facta Non Verba" (deeds not words) nung aliba ama akang-akanga nokdaka sorkari nangzükba mapa ajanga nung maneni takok ngua inyaksü ta sangoktsür, ta NDPP sangdong ajangasa ashi.



DAPCU, OST and IEF Sungkomen Unit ajanga UPHC Yimyu Mokokchung den lunjemer IMDH Mokokchung nung OST clients tem atema Special Health Camp ka ayongzükba liasü. Iba camp nung nisung 67 teyari agia liasü.

Dimapur nung Ao Officers telongjem tenzüker

Dimapur, April 05 (TYO) : Government mapa balala nung Dimapur, Chumoukedima, Niuland aser Peren districts nung inyaker Aor ketdangsertem telongjem ka tentettsü bangjemogo aser iba telongjem tenüngji ' Dimapur Zone Ao Officers' Forum' ta agüja lir.

Iba telongjem tenzüker sentong ka tan April 08, 2023 anogo nung Hotel Saramati , Dimapur nung anüngdang 11:00 ako nung agitsü renema lir. Iba telongjem yagi nübortem sobaliba aser loktiliba tajungba küma indaksütsüba nung leniba

tajung aser teyari tulu agütsütsü imlar.

Iba telongjem tenzüker osang aser sentong ya Aor officer shia ket tongtsütsü tasak, anungji metongtsüetba atema sasar , ajisiüka imlibilema Dimapur, Chumoukedima, Niuland aser Peren districts nung inyaker aser alir Aor government officer-tembo ajak arua dendaktsüner ta Organising Committee nung tayonger Wb.I.Anungba Sanglir aser tezülur Wb.Lanuzülü nati mepishia metetdaksüogo.

NPCC tir Supongmeren Jamir-i Congress lenir Sonia Gandhi ajuru



Dimapur, Rongchii/April 05 (TYO): NPCC tir S. Supongmeren Jamir aser par teloki April 5, 2023 nü Sonia Gandhi den lar kidang ajurutepa liasü.

Iba mapang Sonia Gandhi-i

NPCC tir tasenba den tepela lemsatep aser party indang sentong aser policy tem rasaa ashi aser laisa tir tasenba aser party dang yimdak yimtsüngtemi oa nüburtemi ashiba anga parnok den inyaksü ayongzükba liasü.

State nung tzungsang mopung jenjang metetdaksü

Dimapur, Rongchii/April 05 (TYO): Nagaland State Disaster Management Authority (NSDMA) ajanga sangdong ka nung, Nagaland nung April 5 nungi 10, 2023 tashi mepet agi sübanga tzunglu arutsü, ta metetdaksü.

Ajisüaka Peren, Dimapur, Kohima, Tseminyu, Wokha, Mokokchung, Tuensang, Mon, Longleng aser Phek district tem kübok tesem kar nung April 5, 2023 nü tsüng-tzüngpret aser mopung tesashi dener tzunglu

arutsü amai sayur, ta ashi. State nung iba mapang temperature tajemba aser timba ya 9°C aser 36°C tsüngta alitsü.

NSDMA, Home Department ajanga nüburtem dang iba mapang lendong timtem nungi jenbua alitsü asoshi kumdanga alitsü ajungshia liasü.

Parnokisa District Disaster Management Authorities ajak danga ser danga line department tem dang nisung takum aser ki o jen kumzüktsü asoshi renema aser saksalema alitsü ayongzükba liasü.

Mokokchung DC ajanga mozü kumdanga ayoktsü metetdaksür

Dimapur, Rongchii/April 05 (TYO): Deputy Commissioner, Mokokchung, Shashank Pratap Singh, IAS ajanga sangdong ka nung, Drugs and Cosmetics Act indang Rule 65 nung shia aliba ama aser Gazette sangdong ajanga agizükba ama, Mokokchung district telongzük nung aliba Pharmacies/Medical Stores ajak dang tsünglanglen totuyuba agüja aliba sülen shidak anidaksü metetdaksüogo.

Schedule 'X' 'H' aser 'HI' kübok shia aliba mozü tem, koba yimya agi kanga kumdanga amshitsü lir, item ya Registered Medical Practitioner ajanga agitsü ashiba sülen ang aser shia aliba ama ayoktsüla. Item mozü ayokba ya register balaka nung bendentsüla, kong prescriber tenüng aser address, shiranger aser mozü, mozü kwi ayok aser iba amala record ya küm asem atema bendena ayutsüla aser inspection atema agütsütsüla, ta sangdong ajanga ashi.

Iba den bendenloksema tanur temeden wazüka ayutsü aser tanurtem temesepeba mozü achi-ajemba nokdaksü atema National Commission for Protection of Child Rights (NCPCR) ajanga yangluba Joint

Action Plan nung shilem ka ama Schedule 'X' 'H' aser 'HI' mozü ayokba Pharmacies/Medical Stores ajak nung iba sangdong agütsüba anogo nungi ita ana tsüngta CCTV camera den ita ana data store sütetba recording aser storage inoktsüla, ta ashi.

CCTV camera tem nung tangoka aliba footage ya District Drug Controller Authority/ District Enforcement Force, Mokokchung ajanga mapang shia reprangtsü. Iba totuyuba sülen manidaker nem CrPC indang Section 133 kübok tapet temerenshi agütsütsü.

Deputy Commissioner, Mokokchung ajangasa nüburtem dang aser talisa Mokokchung district kübok aliba Government aser Private Schools/Colleges indang Head of Institutions/ Administrators/Proprietors dang kaketshir temi school telongzük nung temesepeba chiyongtsü (Moko/Yi/Mozü) achiba nungi nokdangtsü mechi school telongzük/takdang nung CCTV camera inoktsü ayongzük.

District Child Protection Unit, Mokokchung ajanga mashi mapang CCTVs inoka alibatem repranga jajatsü, ta sangdong ajangasa ashi.

GOVERNMENT OF NAGALAND
DIRECTORATE OF SCHOOL EDUCATION
 NAGALAND :: KOHIMA

NO.ED/SCH/RIMC/EE/2017-18

Dated 3rd April 2023.

ADVERTISEMENT

Advertisement for admission of boys and girls to Class VIII in Rashtriya Indian Military College (RIMC), Dehradun, for January 2024 term to be conducted on 03rd June 2023 (Saturday).

- Both boys and girls are eligible to apply for admission to the RIMC, Dehradun. The candidates should be in the age bracket of 11½ to 13 years as on 01 Jan 2024, i.e., they should not be born earlier than 02 Jan 2011 and not later than 01 July 2012.
- Candidates should either be studying in Class VII or should have passed Class VII from any recognised school at the time of admission to the RIMC i.e. 1st January 2024.
- The written part of the examination will consist of three papers namely Mathematics, General Knowledge and English. The Mathematics, General Knowledge and English papers will be conducted between 0930-1100hrs, 1200-1300hrs and 1430-1630hrs respectively on 3rd June 2023 (Saturday). The date for the interview will be intimated at a later date only for those candidates who secure 50% marks in all the papers in the written exam.
- Application form cum Prospectus and booklet of old question papers can be obtained from The Rastriya Indian Military College, Garhi Cantt, Dehradun, Uttarakhand, Pin 248003 through online payment on RIMC website www.rimc.gov.in or speed post by forwarding self addressed slip and an account payee bank demand draft of Rs 600/- for General Candidates and Rs 555/- for SC/ST Candidates. The Demand Draft will be made in favour of THE COMMANDANT, RIMC DEHRADUN, DRAWEE BRANCH, STATE BANK OF INDIA, TEL BHAVAN, DEHRADUN (BANK CODE -01576), UTTARAKHAND.
- Application on prescribed form accompanied by 2 passport size photographs, Domicile Certificate, Photocopy of Aadhar Card (both sides), Birth Certificate issued by Municipal Corporation, ST/SC Certificate and Certificate from the Principal of the school in original and photograph on it attested stating date of birth and class studying should be submitted to the Directorate of School Education.

(THAVASEELAN K) IAS
 Principal Director.

DIMAPUR ZONE AO OFFICERS TELONGJEM

Lokti Tentetba Senden Sentong (Launching Programme)

Anogo: 8th April 2023, Mapang: 11:00 AM

Tesentepdak : Hotel Saramati, Dimapur.

- Menden : (a). Wb. I. Anungba Sanglir, Convener
(b). Wb. Lanuzulu Aier, Secretary
Organizing Committee.
- Sarasademsü : Rev. Panger Jamir, Pastor
Unity Ao Baptist Arogo.
- Menden Okila :
- Tepela-O : Wb. Meren Nokpu, President,
Ao Senso Telongjem Dimapur.
- Temeja Ken ka : Kr. Moajungla Jamir
- Tajungshi-O : Wb. Sentyanger Imchen IAS,
Addl. Chief Secretary, Govt. of Nagaland.
- Osangtem agitsü : (a). Wb. Imosong Imsong, Convener
Constitution Drafting Committee.
(b). Wb. Marpokba Pongen, Convener
Nominating Committee.
- Ketdangpur tasen asoshi
müjeta Sarasademsü : Rev. Dr. Temjen Ozüküm, Pastor
Indisen Baptist Arogo.
- Ketdangpur tasen rongnungi
Tepela-O jimbisü : Tir
- Melepzüng-O :
- Tatem sarasadem : Wt. Aoinla, President,
Dimapur Watsü Telongjem.

METETDAKTSÜR

- Iba sentong nung Dimapur Zone (Dimapur, Chumukidema, Nuiland aser Peren District) kübok aliba Aor officers ajak medema arua atentsü ayongzüker.
- Iba sentong takok tulu ngua mongtetsü asoshi ajaki sarasadema atati.

NCERT kaket nungi chapter kar indokba atema Congress-i sorkar aitsü

New Delhi, April 05 (Agencies): NCERT indang class 12 textbooks tasenba nung puti otsü kar indokba atema Congress-i Centre sorkar aitsü.

Textbooks nungi indokba chapters rongnung Mahatma Gandhi-i Hindu-Muslim telongjem atema inyakba ajanga Hindu yimsü alia amangertem jashiba aser mapang tatsüka atema RSS nokdangba densema lir.

Ajisüaka NCERT-ibo, taküm curriculum nung kecha meindok aser syllabus ya yaküm June ita nung renemba lir, ta metetdaksü.

Class 12 purtem indang political science textbooks tasenba nung keta maliba chapters rongnung - "Gandhi

asüba ajanga linük nung yimsü balala tsüingda tensa melenshiba", "Gandhi-i Hindu-Muslim telongjem atema inyakba ajanga Hindu yimsü alia amangertem jashidaksü", "RSS ama organisations kar mapang tatsüka atema nokdanga liasü", "yimsü nung ajemdaker politics asüyaba ajema aküm" chapters densema lir.

Textbooks nung item otsü indokba atema sorkar aija Congress general secretary, Jairam Ramesh-i Twitter ajanga, "mangyangba ajanga meshiteta shidoker," ta ashi.

Ano textbook nungi Mughal aser Dalit nunger kaketzürlurtem züingdokba metetdakja Ramesh-i, "Iba ya ajanga sorkar

melungsentsü jungkai adoktsür. Kechiyong RSS-i Gandhi amakba dang masü saka Dr Ambedkar anema-a nokdaka liasü," ta ashi.

Ano külen Union Minister, Shobha Karandlaje-i, textbooks nungi otsü kar züingdokbaji pusema "India nunger puti otsü raksatsür tulutibaji Congress lir aser BJP-i tesüiba mapang aibelen alibatem metongshir dang," ta ashi.

Textbooks nungi otsü kar züingdokba dak sendakba nung NCERT ketdangser kati, "Subject nung mongin committee kati Gandhi dak sendakba kar züingdoksü benok aser ibaji yaküm ang agizüka liasü," ta metetdaksü.

India linük nung ano nisung 4,435 dak coronavirus putetogo

New Delhi, Rongchii/April 05 (Agencies): Tesüiba ghonda 24 tsüingda India nung ano nisung 4,435 dak coronavirus putetogo, aser ibaji tesüiba anogo 163 days (ita 5 ser anogo 13) tsüingda anogo ka kija nung nisung teimtiba dak iba tashidak putetba lir, ta Bodhbarnü Union health ministry-i metetdaksü.

Yaküm September 25 nü nisung 4,777 dak coronavirus putetba sülenbo tang mezüing

anogo ka kija nung nisung teimtiba dak iba tashidak puteter.

Coronavirus prok tenzüka sülen tang tashi nung India nung nisung crore 4.47 (4,47,33,719) dak coronavirus putetogo aser tesüiba ghonda 24 tsüingda coronavirus agi shiranger nisung 15 asüba densemabo tang tashi nung nisung 5,30,916 süogo.

Tesüiba ghonda 24 tsüingda iba wara agi asür nisung 15 ji Maharashtra nungi nisung pezü,

Chhattisgarh, Delhi, Gujarat, Haryana, Karnataka, Puducherry aser Rajasthan state shia nung nisung kaka aser Kerala nung nisung pezü asüba densema lir.

Tang linük nung coronavirus agi teshirangdakpur 23,091 kümogo.

Tang India nung anogo shia coronavirus positive putetba shilem 3.38 kümogo aser hopta shia positive putetba shilem 2.79 kümogo.



April 05, 2023 nü Maharashtra nung Anti-Terrorism Squad (ATS)-i Ratnagiri anasa Shahrukh Saifi apuba sülen tangokba noksa nung angur. Kerala nung train ka nung mi senoktsüba ken o nung temelung melemi Saifi puogo. Iba lendong nung nisung asem asü.



April 05, 2023 nü Rashtrapati Bhavan, New Delhi nung Tir, Droupadi Murmu-i South Sudan nung Transitional National Assembly nung Speaker, Jemma Nunu Kumba ajurudang tangokba noksa nung angur.

Kechiba Kiren Rijju-i China anema ola madokteter?: NCP

Mumbai, April 05 agütsüogo; China-i (Agencies): Bodhbarnü Arunachal ya Tibet shilem ka Nationalist Congress Party lir, ta ashir.

(NCP)-i, kechiba Arunachal NCP national otongdar, Pradesh nungi Union Law Clyde Crasto-i sangdong ka Minister, Kiren Rijju-i ajanga, "Iba onük nung Arunachal Pradesh nung kechiba Rijju-i ola madoker? China-i tesem kar nungja Pai langka tsübur asü? Pa ya melentsüba atema ola Arunachal Pradesh nungi madoker?, ta asüingdang. MP lir, anungji China-i item

Tawa China-i Arunachal nungja melenshitsüba anema Pradesh nung tesem 11 nem mezüing ola adokerji pa China nunger nungja asütsüla," ta metetdaksü.



TIR YIMYIM YIMOBILEM (EDITORIAL)

DIMAPUR YANGTEPNÜ, RONGCHII (APRIL) 06, 2023

Meshimetsürtem agi süngogo

Tanü asüng, balaka, Dimapur yimti nung mejaka ao majung meshimetsür ajurur aser item rongnungji, taoksatsüka, ano tanü asüngbo Naga nungertema karbo tsümartem jilu bena meshimetsüa mena angur. Atangji, Nagaland nungbo Naga nunger ajak meshimetsür jenjang nung lir. Ajsüaka, tepilaji, Dimapur yimti yimdong nung meshimetsürtem amatobo masü, Naga nunger meshimetsürtembo teka kisüng agi meshir masü saka kar pen amer meshir, kar prangpong amer meshir aser karbo sarasadema meshir. Ano, Naga nungertem aika election temerbo pi ki sema meshimetsüa senzür aser karbo meshimetsüi Delhi-i ao manener. Aji oda, asenok rongnung teinyaker aser tagütsürbo mali saka ajak pi dang meshir tetsa akümnungji, Nagaland ya benjonga junga memongtettsüsa meshimetsür agi sünga aliba lima kümdagi. Atangji, meshimetsür asüyonga nisung asünungji makayonga benjongbo mongnütsü, anungji asenokbo benjong amongtsübajia meshimetsütsü. Aji oda, takar aser arrleper sübo aben, shipo azük, penbang enok aser tokolak nung ozümi asong ta ser tangar dang meshimetsüa benjong amongba kinji asenok lir. Iba tia ya bilemdanga, asenoki asenoksasa iba ama meshimetsür jenjang nungi peisasa pei taküm litetba senso tajung küma litettsübajia asenok asoshi tebilemtsü, tayongzükba aser teinyaksü mapa tulu kümogo. Khen bilemtsübo, Dimapur yimti yimdong nung tsümar meshimetsürtem arua amongba ya meshimetsür limai meshimetsürtem arua amonger amai lir, anungji meshimeshimsürtemi meshimetsürtem dang meshimetsür. Ajsüaka, Naga nungertema meshimetsür jenjang nung liaka, tajung kaji, asenok dak temeim lir, anungji asenok ket nung asena meperitsüsa dang senotsü tera bena aliba nungi asenoki tsümar meshimetsürtem tiaji ngur kecha magütsü serbo toktsür moutetter. Iba jagi asenoki yimdong nung ajuruba meshimetsür nem sen ka ana ta masü sen ter metsü tashia agütsür. Iba temeim jagi meshimetsürtemji Dimapur nung pelashishia meshimetsüa amonger aser parnok yimtsür yimer aser kinungertema jaoka meshimetsüdaktsür. Iba jagi Dimapur yimti yimdong nung meshimetsür tali tali akümba angur. Item meshimetsürtem ya parnoksasa aruba masü saka parnok anir arua meshimetsüdaktsürtem lir. Aji oda, nisung karbo matamabensartem anidena meshimetsüdaktsüba ya business tulu küma inyaker. Item jagi anepdang yakta item meshimetsürtemji tesem tesem nung toktsütsü aser aonung anidentsü aser anogo piyong parnok sarudenba sen to meshia ayutsü ta anogo shia nisung kar asoshi meshimetsürtemji par asoshi yimti nung sen sarutsürtem lir. Atangji, meshimetsürtem tiaji reprangdangra temeimsüka, tetsür karbo pei chir shitak masü tepi nung yur meshimetsüa angur, kar tetsüng mali, kar teben mali, kar tenük tapok aser karbo tenük agi kodanganga meranglok timtemba purtem meshimetsüa angur. Ibayongji, asenok mulungjang nung tapu tapu bilemyonga meima aiter aser agütsür. Iba jagi meshimetsürtembo renloker. Asenoki iba tensa tia ya jungjunga shisadangtsüla aser asenoka meshimetsüba tia nungi anentsüla aser yimti yimdong nung tsümartem meshimetsüa amenba aser jajaba purtem yaa anendaktsütsü sentong kar atongtsüla. Atangji, asenok ya tenüng agibo Khristan state, anungji temeima memeim meshimetsürtem aridoktsübajia asenok dak mapet, anungji temeim mapatem kar ajanga parnokji meshimetsüba anendaktsütsü merangtsüla. Aji oda, local MLA mesüra local administration den külem ser meshimetsürtem anidena anogo piyong chiyongtsü agüja anepaluba tesem ka mesemtetsü aser yangji meshimetsürtemji anidena yutsütsü aser parnok rongnung aonung tanii marurtembo yangji yipdaktsütsü. Itemji anidena anepalutsü atema NGO mesüra arogo kar bushitsü aser local police teyari dena agia iba mapaji inyaksü. Iba amaji kodang asenoki temeim agi yimti yimdong nung meshimetsüba mapatem ya anendaktsütsü merangdir, meshimetsürtem anidena anepaluba kidang nung jagi meshimetsür shinga hopta junga melii pei pei kidangi oa adoktsü. Iba ama sentong jagi Nagaland nungi meshimetsürtem tanemi odaktsütetsü aser iba ama mapa jagi asenoka meshimetsü masütsü ajungshitsü.

OLEMSABANG

GOOD FRIDAY

~ C. Walu

(Yashi adok nungi...)

Pa tereprangtsü asoajen tulu aser tobur tajung bangdak tashi tulu aketba nisung ka ta ni ajitet. Saka pa dak kanga azükba jagi pai mejajateti laojialaojia jaja aoba ni angu. Kangki taretji apur laojia laojia jajadang pa ni anasa arudang ni pa tekolak nung zübu tajem nungi azü ayimba jagi ku ajak menateper angu. Yamaji süaka sepaitemi pa dakji tanen makai azükba den pa teberem zübu nungi azüji ayong ama ayimba ni angu. Idakji ano lisü aser süng agi azük nungji pa kü tsüngdang lao, aser ariana noktakba ni angu. Idangji ano nisungtemi pa dak ajemoktsü. Joko pa temang nungi azü ayimba den tapubang nung kangki taretji apuloker noktaksü mokoki kümer kü tsüngdang lao. Tanga ni itemji bilemtetdang azükjang meronga aiter. Pai anarongtena noktaker jajadi asünung sepaitem jagi ajemoktsü, aser kangki agi neneter alidangji pa zübu nungji lisü agi repjen arep.

Iba nisung nem khen danga noktaksü mapang magütsüi sepaitem aser telokti jagi zükmeso. Pai noktaker mera ka danga aotsü mokoki aküm. Ano tip külen tenemjia mapang shitak nung atongtsüla. Yamaji mesüra par yimsü raksara mapadongji atsülangtsü. Kechiaser ibai benjong mapang asünung kari danga kangkiji melenzüka apura iba nisungji memerüki kümdaktsütsü. Anungji melenzüka apur mali. Sepaitem rongnung kati lungma talang kati tur repranga aodang, ni sentsü tanak den tar talangji pai angu. Anungji pai arua lao aliba nisungba tsüngdang ni nongoktsü aser kangkiji khen aputsü ozüng agütsü.

Idangji ni sepaitem dang niji shiba kolen nungi kechi atema aru aji ashitsü merang, saka ozüngji kanga tesashi liasü. Zübu agi sünger azü yima tashi maiti kangki agi neneter aliba nisung jagi kü dang imlibilema khen yariang ta ashir amai kü dak ranglok. Anungji ni pa kangkiji aputsü atema kü tapu nema alu, saka ni bilemba ama mesüi iba kangkiji kanga taret liasü. Anarongtena ni pa kangkiji belenzüka apur noktak. Idangji zübu agi sünger alisangji tanem tanemi kü sülen anidak. Pa tejakji ni reprang nung azü ayong ama yima alubaji angu. Saka pa tejak nungji temeim agi sünga ola tila agi sarasademer ama ni ajitet. Iba nisung shiba? ta kü mulung nung asüngdanga jaja. Iba kangki taret apuba jagi kü tapubang nung pai kongshia ni anüpba, aser kü mulungjang teraksa anüptsüba ni kodanga mamar.

Tenemji tongerbo ni repranga lia iba nisungji sepaitemi kangki manungji mejangdaksü. Pai ajemalua pa teka salaa kangkidong nungji ayu. Pai anünglen reprangdang pa tejakji taochi agi sünga, aser pa tenükji tepinu prangshiba ama ni 3

angu. Ni pa dak repranga alidangji paia kü dak ranglok aser ola tila agi ashi, "medemer, Obalai na moajang." Idangji sepai kati yakta dang kojaj bener arua pa teka aser tetsüng nung ola tashi agi angenba ni angashi.

Pa den külemi nisung ana: Dismas aser Gesmas tena ola adoka kojaj agi angenba ni angu. Iba sülen telok jagi kangkiji mesor tarok nungji tashi agi asenoktsü dang, nisung ana jagibo ola tulu adok, saka tiyong nung alisang jagibo sarasademba ola dang ni angashi. Timtem pataka manungji Gesmas-ibo kü tembarsangji atalaja "na Khristaji süra ne sasa aser asen asemprongla kümzükang" ta ashi. Saka Dismasibo Gesmasji arütsü, aser nisungba tsütsü tejak meyiper ashi, "Yisu na yimli arudang nia bilemtetangma." Idangji kü tembar jagi ajemalua ashi, "Na tanüsa kü den paradise nung alitsü."

Kasa mapang nungjisa nirepranga lia putiungertem arua kü tembarji atalaja, 'Hai na chuba, nisung tamajunger den asür na? Ajiang nisungji pa medemer agi paji shibar asenoki meteter ta atalaja menütsüba ni angu. Kü mulung nung item ya tenla kidang tesayurtem masü no? ta asüngdang. Tang asem baji shi nung anüngji manga aküm, yipru tulu arutsüsa alimaji ammag. Nisungtemji pei kidangi jenshia ao, saka ni kangki anasa noktaka liasü. Item rongnung ni kü temba tetsü Mary ajuru, aser la dang ni shibar rasaa ashi. Idangji lai jabaso kangki aputsüba atema kanga pelar, paji Tsüngrem chir ta ni tang metetogo ta ashi. Idangji ano lai kü dang melangzüdang kangki nungjagi ola tulu agi ayimtena ashi, "Oba ne ket nung ni kü nela bendanga agütsür", iba sülen ano, "ya renemogo" ta shir kü tembaji amuzüka ao.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

Koinonia Prayer Centre nung 'Dry Fasting' atema building semzük



March 4, 2023 nü Koinonia Prayer Centre (KPC), Tsiesema Basa nung 'Dry Fasting' atema building tasen ka semzükba sülen Rev. Zotuo Kiewhuo den Arogo nung tenzükertem külemi tangokba noksa nung angur.

Kohima, Monupii/April 05 (TYO): Mongolbarnü (March 4, 2023) Koinonia Prayer Centre (KPC), Tsiesema Basa nung 'Dry Fasting' atema building tasen ka semzükogo; iba ya Koinonia Baptist Church (KBC) indang ministry ka asütsü. Iba building tasenba ya Koinonia Baptist Church Founder Pastor aser Kohima Bible College tenzüksang, Rev. Zotuo Kiewhuo-i meshiteta semzüksü.

Koinonia Media Ministry-i sangdong ka ajanga, iba building ya Kohima nung aliba Format Associate-i design süja liasü, ta metetdaksü. Building tasenba semzükba sentong nung jembidang Rev. Kiewhuo-i, 2014 küm Koinonia Prayer Centre tenzükba liasü aser iba tesem ya Khristantem sarasademtsü aser lumitsü atema kanga tongtibang tesem ka lir, koba ajanga pei tanela asentenshir, ta metetdaksü. Paisa amangbapurtem

dang, Khristantemi kanga mita alitsüla aser sarasadema alitsüla, kechiyong iba nungji tashi lir, ta ashi. Mathi tapu 6 nung ajemdaker pai, sarasademba ya Tsüngrem den miima jembiba lir, sarasadem ajanga Satan madak takok angur aser Tsüngrem tekümzükba kübok alir, ta ashi. Iba sentong ya KPC nung Associate pastor, H Rokopra Mekro leniba nung agi aser Neilhou Sopfunuo-i ken ka tena liasü.

Pastor aser missionary, Dean Elliott gari lendong ka nung tsükset



April 05, 2023: Taoba Amongnü (April 02) missionary aser pastor ka Michigan nung aliba Arogo ka nung sayutsüngitsü atema gari nung aoba mapang gari lendong nung tsükseta süogo. Yi jagi meseper gari anir lanur kati gari mekümdangi aniba ajanga iba lendong atalok, aser iba lendong nungji pastor Dean Elliott süogo, ta police-i metetdaksü. Arrshi küm 63, Elliott ya Byron Center nung pastor teinyakdak liasü aser Abounding Hope ministry nunga inyaka liasü. April 2 anepdang 8:30 ako meta gari lendong nung pa asü. Kasa lendong nungji gari mekümdangi anisang arrshi küm 30 tebur kata kanga mejungi yiru. Tawa Manistee Assembly of God nung pastor nungi anisüngzüksang, Patrick Pointer-i, pastor Elliott Arogo ka nung sayutsüngitsü aoba

mapang nung lendong ajurua asü, ta metetdaksü. Hombarnü Patrick-i Facebook post ka ajanga, "Kü melungjang kanga raksar. Ni temang mejungi dang aliba agi taküm January ita nung ni Manistee Assembly of God nung pastor nungi anisüngzükba liasü. Iba mapang nungjagi tenzükba ozü Arogo nung Pastor mali, ibayongji hopta shia o jembirtem, pastor tem, missionary tem aser sayutsüngirtem onoki jaoker. Yashi April 2, 2023 nü Pastor, Missionary Evangelist Dean Elliott-i ozü Arogo nung sayutsüngitsü atema aruba mapang gari lendong nung asü," ta metetdaksü. Paisa, "Kü melungjang kanga raksaogo. Easter mongpu nung yashi (April 2) Yisu Khrista Yirusalem yimtii takok nung ai. Dean-a kodaki takok nung iogo aser Yisu kabu nung lir," ta lemsatsep. "Iba lendong atema

mangyimer par kibong aser medemertem atema sarasademtsür. Dean-i pa taküm nung Tsüngrem tajaba meteta meima liasü, aser Khrista tenzüksü jangraba mapang nung asü," ta paisa lemsatsep. 2003 küm Elliott aser pa kinüngtsü, Brenda nati Abounding Hope ministry tenzükba liasü aser iba telok yagi Europe aser Asai nung, talisa India nung rangloker inyaker. Parnok indang website ajanga ashiba agi, Abounding Hope ministry-i continent pongu nung linük 58 nung tenzükber. Holland nung aliba Northpoint Assembly of God nung pastor, Joe Coffman-i, "Elliott ya "missionary evangelist" ka liasü. Pa ya jangratemtsü nisung ka liasü. Pai par kibong meim aser Arogo kanga meima liasü," ta ashi. Huntsville, Alabama nung aliba Paraclete Ministries tenzüksang aser Tir, M. Wayne Benson-i, "Ni lanur asüba mapang nungi ni Dean junga meteta liasü aser pa tanela nung ainba ni meteta lir. Pa lanur asüdangyongi pai Tsüngrem tajaba tejangja meteta liasü aser mission mapa aika inyak. Pai David aser Beth Grant na densema nungtugu nisung aika den külemi inyaksempogo," ta lemsatsep. Dean Elliott-i pa kinüngtsü den chirnur ana toktsür pilaogo.

ANOGO ABEN TSÜNGREM DEN

Tzüsem Temalen Reprangang T.ken 93:1-5

Tamajunger mapa agi na nungpanga arudang nai kechi inyaksü? Ken züluri kechi inyak agi inyakang. Pai Tsüngremer chuba menden reprang. "Kibubai chubar; pa sentsüwangshi agi sobua lir; Kibuba tashi tait agi sobua lir; iba jagi Pai pasasa naibanga lir: alimaji marakzütettsüsa tenteta lir" (t.1). Yipru mopungi Kibuba chuba menden marakzütetdaksütsü: saka aiben asenoki temalen merepranger. Asenoki yipruji angur saka Tsüngrembo mangur. Asenoki tzüsem temaba temabai angur, aser asenoki tamang agi Tsüngrem chuba menden akanga yanglua aliba mangur.

Ano ken züluri Tsüngremer taküm kuli angashi. Pai tzüsem nungtepba ola manga. Tanü nai tetsübutsü ola aika angashitsü akok. Item nung temulung tagütsü. "Ne kidang teti tatem maka temeshi alitsüji tim dang" (t.5). Ken züluri Tsüngremer taküm kuli angashi aser ashi, "Ni Tsüngrem O nung amangtsü akok."

Iba ken yagi Peter tzüma nung jajaba bilemtetdaksür (Matt. 14:28-31). Pai pa tenük Kibuba nungi pilar aser Pa tenangzükba amatok. Yisui pa dang ashi, "Arung." Peteri nungdakba ajunga agi ibaji dang liasü. Pai pasasa dang ya ashitsüba liasü, "Yisui 'Arung,' ta ashir süra, ni arutsü akok"- kechiaser teti pa ozüngji ain agütsüba lir.

Tsüngrem chuba menden yanglua lir, aser Pa taküm kuliji shidak. Kodang nai yipru aruba ngudir, Tsüngrem chuba menden angutsü asoshi ne tenük azükleni rangketa yokang aser Pa angashitsü asoshi ne narong lapokjang. Pai tashi aser ain agütsütsü nangzükba nung ne tamang yuang aser amangang.

Hartlepool nung Good Friday nü 'Walk of Witness' sentong agitsü



2022 küm Good Friday nü Hartlepool jila (UK) nung 'Walk of Witness' sentong agidang tangokba noksa nung angur.

April 05, 2023: Küm shia alima tesem ajaklen Good Friday nü UK kübok Khristantem atema tongtibang Hartlepool jila nung 'Walk of Witness' sentong ayongzükba mapang ka lir," ta ashi. St Mary's, St Patrick's, St Khristantemi peipei Tenla ki John Vianney aser St Joseph's nungi Victory Square tashi Arogotem nung züngsemtemi Kangki apur shilem agia jajar; shilem kaka agitsü aser Kangki yamaji taküm-a Good Friday nü apur 'Walk of Witness' nung iba sentong agitsü. shilem agitsü. Good Friday nü (April 7, Bernadette-i, "Kangki apur 2023) anüngdang 11:00 ako jajaba mapang tesem-tesem nung telok balalai sarasadem nung 11:15 ako nungi moapu agitsü, tatemsa War Memorial nung tekülem sentong tatsüka nung adenshia sarasadem agiba sülen 'Walk of Witness' anaben agitsü," ta metetdaksü. sentong agitsü. Hokolbar anepdang Arogo Hartlepool Youth Ministry balalai mapang balala nung pei coordination team nungi Tenla kidang nungi apusotsü Bernadette Malcolmson-i, "Ozü aser tesüsa War Memorial nung Arogo atema iba ya kanga Kangki ayuba sülen tongtibang sentong ka lir aser tatembangbuba sentong agitsü.

AO OSHI ANGAZÜKDAK:
TANÜ ANGAZÜKTSÜBA OJANG



Pokmendak

(n) Olorar chiyongdak (hotel)

* Aori lapokba pokmendak jangratema chiyonger.

Pokmentsümen

(n) telok anema chiyongtsü renemkonemba (food preparation for a mass of people)

* **Pokmentsümen** atema awazür tajung aika nüngdaker.

OLONG PAITEP # 6479

	1			2	3			
4			5					6
					7			
	8							
	9		10			11		
					12			13
14								
					15			

TIPIEN

- 2. Sü jeplok - (4)
- 4. O agi merenshi - (5)
- 7. Ayongküm li - (5)
- 8. Chiyongtsü mapang süiadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

LANGTSÜNGLEN

- 1. _____ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. _____ kibur - (5)
- 13. Tebur tembar tsüngda jatepba - (4)

OLONG PAITEP # 6478 TELANGZÜBA

TIPIEN :

- 1. Semtu, 3. Lepko, 5. Bilem,
- 8. Ulu, 10. Tsüngpang,
- 11. Tesangwa, 13. Aoksa,
- 15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong,
- 6. Lungkak, 7. Milak, 9. Zünga,
- 10. Temopu, 12. Walu, 14. Ali.

KHEN SHISADANGDI

TANÜ ASEN LIMA TEJAKLENI AOKA NOKSA

Boss-ba : Ohoi lennirtem...Sentsüh Crore aika dang lir-kodi.

Lennirtem : OK.... Boooooosssssssssss.

Boss-ba : Lenmang to sen agi meperiji meinyaki yua lir-kodi.

Lennirtem : OK.....Boooooosssssssssss.

Boss-ba : O-bendangdak ki to meinyaki anena yua lir-kodi.

Lennirtem : OK..... Boooooosssssssssss.

Boss -ba : Asayadak moapu to meinyaki anena yua lir-kodi.

Lennirtem : OK....Boooooosssssssssss.

Boss-ba : Asenok-bo Kaziranga Forest nung lua ita ishika jangradema sütok-sünema munger atudi nii ???

Lennirtem : Thank You....Boooooosssss.

~ L.Kika Pongener.

Sikkim rüjeb lendong nung tourist 7 asü; 13 yiru



Gangtok, April 5, 2023 (Agencies): April 4 anepdang 11:00 ako meta Sikkim kübok Nathu La (Indo-China border) tesem nung rü anenzüka aludang tourist 20 jungnüa anebanga liasü. Iba lendong nung tourist 7 asü aser 13 yiru.

"Tasürtemji Nepal nungi 3, Uttar Pradesh nungi 2 aser West Bengal nungi 2 lir" ta Gangtok DC Tushar G Nihare, IAS-i ashi.

Gangtok-Nathu La lenmang nung iba lendong atalokba sülen State Disaster Management Team, Police aser iba tesem nung alirtemi search & rescue mission inyak.

Lendong nung yirurtem Gangtok nung mozü ki balala nung anepalu aser tasürtem rongnung arishi küm 6 tanur ka dena liasü.

"Onok iba tesem nung küm aika lia arur aser risk zone ka

masü, saka rüjeb kanga alaba ajanga lenmang nembang. BRO-i rüjebji yahdoka lenmang lapok saka tourist temi rüjeb jagi aodang anenzüka alu" ya Joint Forest Management Committee züngsem Man Bahadur Mukhia-i ashi.

"Küm aika tourist temi Changu-Nathula semdang saka 13th Mile nung iba ama lendong kodanga matalokdang. Onoki nisungtem kümzüksü atema inyakdar. Rüjeb agi nisungtem anebanga lir saka onoki parnok taküm kümzükür" ta Sikkim Police Special DGP Akshay Sachdeva-ia ashi.

"Sikkim nung rüjeb anenzüka aoba lendong atema temulung raksar. Tasür kinungertem den mangyim lemsateper aser yirurtem tekaraba nung taneptsü angutsü imlar. Nisungtem kümzüksüba mapa inyakdar aser akokba tashi teyari agütsüsü" ta

Prime Minister Narendra Modi-ia ashi.

CM Prem Singh Tamang-i mozü kidang anepalurtem semdangogo aser Facebook page nung "tasür kibongtem aser medemertem den asükhü lemsateper aser tasürtemi teti anisüngzük angutsü sarasademtsür" ta metetdaksü.

"Nathula nung rüjeb anenzüka aoba lendong osang angashia kanga aoksar. Iba lendong ya Nathula anasa JN Road, 13th Mile nung atalok. Iba lendong nung taküm samartem atema sarasademtsür aser kinungertem den mangyimer. Ano yirua alirtem taneptsü angutsü atema sarasademtsür" ta SDF president Pawan Chamling-ia ashi.

Mongulbarnü 15th Mile tashi gari 500 shi ka nung tourists 3000 nungi 4000 shi ka atema dang permit agüja liasü.

CM Sarma aser CEM Ronghang kübok ochimashi inyaker: Congress

Guwahati, April 5, 2023 (Agencies): Karbi-Anglong nung gari lenmang yangluba maparen nung sen crore aika tim mesüi amshiba ken o atema Assam Congress-i Assam Chief Minister Himanta Biswa Sarma aser Chief Executive Member Tuliram Ronghang na nem tai tongloktüsügo.

CM Sarma aser Ronghang nati Karbi Anglong nung ochimashi mapa tulu ka inyaker ta Assam Congress-i ashi.

"Assam nung chief minister Himanta Biswa Sarma lenisüba kübok tamakoktsü kecha mali. Karbi Anglong Autonomous Council nung CEM Tuliram Ronghang'er jabasoi anogo tenet tsüngda kilometer 17 gari

lenmang yanglur Rs 30 crore agizüka agiogo. Anogo tenet nungbo iba mapa meinyaktetsü saka Himanta Biswa Sarma aser Tuliram Ronghang na lenisüba kübokbo takoktsü" ta Congress lennir Manjit Mahanta-i ashi.

"Himanta Biswa Sarma aser Tuliram Ronghang nati Karbi Anglong ya ochimashi aser tim masüba inyakba ATM ka kümdaktsüogo" ta Mahanta-isa ashi.

December 22, 2020 nü Public Works Department indang hill wing additional chief engineer (roads and houses) ajanga 'Kache Construction (OPC) Private Limited' nem contract agütsü. Iba sülen hopta ka lir December 29, 2020 nü executive engineer-

i mapa tembangba certificate agütsü, ta paisa metetdaksü.

Singdon Ronghang ya Tuliram Ronghang'er jabaso lir aser pa ya 'Kashi Construction (OPC) Private Limited' kibur lir. Pai kilometer 17 lenmang anogo 7 nung dang yangluzük, ta Congress lennir Mahanta-isa ashi.

Sorkari iba tatalokba atema bushisüngdang asütsüla ta Mahanta-isa takhangba agütsü.

"Chief Minister na aser nü kibongi ochimashi mapa aika inyakogo. Nai Karbi Anglong nung shinga tsütsü meshii bushisüngdang ka asütsü tetuyuba magütsüra nür sorkari nübortem dang nungi auyazüker ta onoki bilemstsüsa akümtsü" ta Mahanta-i ashi.



Mizoram nung Bodbarnü security forces-i Rs 3 crore tema alangba kozüjang apuba sülen agiba noksa angur, Champhai district nung Assam Rifles sepaitemi ozüng alema shibelenba kozüjang apu. Parnoki bosta 536 nung kozüjang abenba apu. "Osang tejangja ka angazükba sülen Assam Rifles aser custom department, Champhai külem telok kati mita aodang kozüjang apu" ta Assam Rifles-i sangdong ka nung metetdaksü.

United States molumi leni aor: Donald Trump

New York, Rongchii/April 05 (Agencies): 2016 election agitsü anasa osang tamajung miimbanga ayutsü mechi business record tiazü agütsüba nung aibelena mali ta tekong meranga nokdakba sülen Donald Trump-i United States molumi leni aor, ta ashi.

Taoba US tir-i 34 ben aibelena lir ta Mongulbarnü New York nung aliba Manhattan court ka nung tai tongloksü.

Item ya porn star Stormy Daniels nem miima sen agütsüba dak sendakba nung lir, shibai Trump kibong kumer liaka tena medema liasü ta ashir.

Puti otsü nung US tir ka anema ken o benoka jembiba Trump ya mezüngbuba alitsü.

"Ni mapa tamajung inyakbaji tasü ita asen linük samatsütsü meranger dang nungi kumzüka ayuba ya lir," ta arishi küm 76 taini Florida nung par Mar-a-Lago kidang adenshia aliba pa bukumer dang ashi.

Pai ashiba agi iba ken o taila ya Democrat temi taruba küm tir election nung amoshitsü meranga tasa ka dang lir, kong pa tokteptsü lir.

Aji masüadang Trump ya

tejak makemer ghonda ka jungnüa okadak mena liasü, kong Judge Juan Merchan-i asüngdangba nung ola tulu adoka langzüa liasü aser pai aibelena mali ta ashi. Pa okadak nungi ayazüka aodang osangbener dang kecha mashi.

2016 tir election agitsü lia sen \$130,000 (£104,000) agütsüba dak sendakba nung taoba tir anema ken o ya benoka lir.

Iba ama tir nübuyim nung yaritsü asoshi sen indokba aser agütsüba ya tai masü, saka miimbanga ayuba ya federal campaign finance law anema lir.

Taoba mapang Trump indang okatsür Michael Cohen, shibai pa anema nokdak, paia sen ya Trump totuyuba nung agütsü, ta shia lir.

Aibelen shia küm pezü tashi tepuokdak ayutsü, saka Trump-i yimya tajung amshira obendangeri temerenshi ajemtsütsü akok.

Trump indang ken o ya January 2024 nungi jembiba tenzüksü akok, ta Judge Merchan-i ashi, tetetzü tir election nung tokteptsü asoshi maparen tenzüksü mapang Republican tem okadaki arutsü.

Yimtenren tsütsü tenüing menüksüsa otsütem miimbangtsü mechi Trump tenüing nung ano senotsü amshia lir, ta prosecutor temi ashir.

Trump Tower nung kishinüker kati Trump indang tarnur ano ka lir ta jembiba miimbangtsü mechi sen \$30,000 agütsü, ta parnoki tai tongloksü.

Aser taoba mapang Playboy model inyaka alir Karen McDougal nema sen \$150,000 agütsü, shibai Trump den shi nung medem ta ashir.

Nisung anaprong nem sen ya National Enquirer ajanga agütsü aser iba osangkaket zülur ya mapang talangka nungi Trump tembar liasü.

Item ken o yagi Trump tir election nung tokteptsü nung menokdangtsü saka ken o jembiba ajanga tenüing menüksü.

Ano 2020 election result melenshitsütsü meranga, Joe Biden-i takok anguba kuli agütsüadang Capitol amakba aser pa White House nungi ainshir tongtipang documents amshiba amala ken o Trump anema benoka lir.

Israel sepaitemi Al-Aqsa Mosque nung tekülemertem apu

Jerusalem, Rongchii/April 05 (Agencies): Occupied East Jerusalem nung aliba Al-Aqsa Mosque compound nung Israel police temi Palestine nung tekülemertem apu.

Palestine nung 400 shi Bodhbarnü apu aser Israel nung ket nung lir, ta Palestine ketdangtsü temi ashir. Parnok ya occupied East Jerusalem kübok Atarot nung police station ka nung yua lir.

Palestine nung tenük kuli alirtemi ashiba agi, Israel sepaitemi tashi tali amshia stun grenades aser tear gas khalokja tekülemertem tango mesashiteti akum, süng aser rifles agi azük.

Palestinian Red Crescent ajanga ashiba agi, iba mapang nisung 12 yiru aser parnok rongnung nisung asem mozü kidang lir. Israel sepaitemi medics tem Al-Aqsa telungi marudaktsüi nokdang, ta parnokisa sangdong ka nung ashi.

Bodhbarnep tashi parnoki iba mapa ya inyak aser Israel sepaitemi mosque kima nungi Palestine nungertem merenshia nungteta yokba aser sarasadem mesüdaktsüba nguogo, aser iba sülen Israel nungertem police-i anir ait.

"Ni menden ka nung mener Quran zünga liasü. Parnoki stun grenades khaloktsü aser kü indang teko nung ka agi aon," ta tantsür kati mosque tezülen tango mesashiteti jepa ashi.

"Mask inoker longkak aiter tem fireworks, süng aser long bener mosque telung nung par sasa shibangba ajanga iba

compound telungi aitsüsa akum," ta Israel police temi sangdong ka nung ashi.

"Police tem telungi aidang parnok dak long agi aon aser longkak aiter telok tulu kati parnok dak mosque telung nungi fireworks khaloktsü. Iba mapang police ka tetsüng yirua liasü," ta sangdong ajanga ashi.

Occupied East Jerusalem aser West Bank nung ita aika tensa mejungi arur. Yangji ano azüdokshi aser lendong ataloktsü tsüboa bilemer, kechiaser Muslim nung lumiba Ramadan ita aser Jewish Passover atema adenshia mapang lir.

"Jerusalem nung kechi atalokogo, ibai tekülemer anema mapa tamajung inyakba lir. Al-Aqsa Mosque nung sarasademtsü asoshi Israel nungi temelaba agitsü menüingdak, kechiaser ibai ozü temeden lir," ta Palestinian Authority Ato Kilonser Mohammad Shtayyeh-i sangdong ka nung ashi.

"Al-Aqsa ya Palestine nung aser Arabs aser Muslim nung ajak atema lir aser aji mita aoba ya 'occupation' (Israel nung) anema nokdaktsü ajungmesoba mapa ka lir," ta pai ashi.

1967 rara sülen 'status quo arrangement' ka kübok Jordan ya Jerusalem nung Khristan aser Muslim nung indang temeshi tesem kibur ama inyaker aser parnokia Israel aija liasü.

Egypt indang foreign ministry-ia Israel dang Al-Aqsa

tekülemer tapi agi merenshiba anentsü ayongzü.

Al-Aqsa ya Islam yimsü nung temeshitiba tesem jenjang tasembuba nung lir aser iba ya Judaism asoshi temeshitiba tesem lir, kong parnoki Temple Mount ta ajar aser taoba mapanga iba mechi Israel aser Gaza indang Hamas yimsüsür tsüngta arütsü alema rara arur aser tesüsa 2021 küm tenzü.

Hamas-i Bodhbarnü atalokba aitsü aser West Bank nung aliba Palestine nung dang Al-Aqsa mosque nung adenshia iba tesem kumzüka ayutsü ayongzü.

Al-Aqsa nung iba lendong atalokba sülen northern Gaza nungi Israel tsütsüi rocket kar khalokja liasü.

Israel army-ia southern Israel nung Sderot yimti anasa aerial defence system ajanga rocket pongu khazüka yok aser pezü nisung malidak tesem nung tsük ta ashi.

Palestine nungeri Al-Aqsa ya par linük maitsü ishika aliba rongnung ka ama züngshir. Ajisüaka Hebron nung aliba Ibrahim Mosque (Cave of the Patriarchs) ama Yihuda nung telok balalai tanem-tanemi iba tesem rakzüak ajemer, kechiaser 1967 sülen Ibrahim Mosque ya tesadang ka synagogue kumdaktsü.

Palestine nungeri yagi far-right Israeli movements asoshi shisabolua bilemer, kechiaser parnoki Al-Aqsa Mosque compound nung Islamic structure benser Yihuda nung tekülem ki yanglutsü meranger.

Office of the MONGSENYIMTI SENSO MUNG DANG
 B.P.O MONGSENYIMTI, P.O CHUCHUYIMLANG
 DIST: MOKOKCHUNG, NAGALAND-798614

14th Nagaland Legislative Assembly Election 27 February 2023 anogo nung agiba nung temerük Mongsenyimti senso tajung Wb.Tongpang Ozukum ajanga nübur shilua tenzüksü meraket yimden jenjang tajung ajangzüktetba nungtem nung ajemalu takotet lenir nem khonang tetushi tulu agütsür.

Mongsenyimti sanger inti "Shilu Maong" Temoatsü bener iba tongpang nung nokdakdang NDPP Angetyongpang unit ketdangtsüri anir area nung mulungtok lenirtemi anir nütsüng nübu ajaki lenir dak nübur tenzüksü jakla reprangteta tetemjen lenir Wb.Tongpang Ozukum shimtetba mulungnen pela ajak den lemsateper.

Lenir dak tamang kateta asen Nagaland Chief Minister Wb.Neiphiu Rio ajanga 24 Angetyongpang meyonger yimsüsür Wb.Tongpang Ozukum nem Advisor, Water Resources Department agutsünung asen Chief minister dang pelaba ayimoktsür.

Asen Angetyongpang sanger aser Naga nüburtem temaba jenjang leni ajungketa anitsü lenir nem Yehova Tsüngremi maneni anema aliba taküm, shisatsü aser arishi moatsütsü Mongsenyimti sensosanger ajak tamang sarasadem.

Sd/- (IMOTONG) President, MSM. **Sd/- (OBANGONEN) Secretary, MSM**

OFFICE OF THE JAPUKONG SENSO TELONGJEM MANGKOLEMBA

TENÜNGSANG AGÜTSÜR

Mangkolemba Japukong Senso Telongjem ajungai Wb. Temjen Imna Along Longkumer, Minister for Tourism aser Higher Education 14th NLA nung shilem agitetsüsa 30th Alongdaki Constituency nungi takok tajung tanaben buba tashi ngutetba atema pa nem konang, aküm, tetushi aser tenungsang tulu agütsür. Iba den pa ama sempet jenti akaba lenir ka constituency pur nem moatsüba asoshi Tsüngrem dang pelar aser pa tenüing asanger.

Ajak yanglusang Tsüngremi asen lenir tenüing dak jaloka temjena nübor asoshi maneni moajangma.

Sd/- President Japukong Senso Telongjem Mangkolemba.

Office of the AO SENDEN LITERATURE BOARD (ASLB)
 MOKOKCHUNG - 798 601, NAGALAND
 Dated: 05/03/2023

ASLB SANGDONG.

Yangi ASLB nungdaktem kar yamai metetdaktsür.

Ao Senden Literature Board-i achaaayanga agiba Arangtet Tatidang 2023 Shiyim Tsüklai 10, 2023 anogo nungi tekübok agüja aliba tesemtem nungi angutsü;

a) Kohima Mr. Aotemjen Jamir (M/No. 8731821467)
 b) Dimapur Mr. P. Alem Jamir (M/No. 7005501457)
 c) ASLB office (9436436180 & 9089816427)

Item tesem nungji tongtepratepa tatidang shiyim agitsü akok aser Tsüklai 30, 2023 tashi nung Office tongtsütsüla.

Sd/- Rev. Prof. Rongsen Longkumer Convener, ASLB/AC **Sd/- I. Temjen Tzüdir Secretary, ASLB/AC**



Beijing, April 5 : France Tir Emmanuel Macron, April 5, 2023 nü China yimtiba Beijing nung aliba Beijing Capital International Airport tonga arudang tangokba noksa nung angur. China Tir Xi Jinping-i jaokba ama Macron ya Bodhbar nikongdang Beijing tonga aru, shiba Hokulbarnü tashi iba linük nung amungtsü. Iba mapang Macron-i China south tsütsü Guangdong Province yimtiba, Guangzhou semdangtsü.

GMS Bayavü annual sports meet tembangogo



Kohima kübok Government Middle School Bayavü nung school asayamung mapang tesayur aser tanurtem tangokba noksa nung angur.

Kohima, Rongchii/April 5 (TYO): Government Middle School (GMS) Bayavü annual Sports Meet April 3 nungi 5 tashi School Campus aser Tsiesema Bawe ground nung takok ngua asayar tembangogo.

School nungi sangdong ka ajanga ashiba agi, April asem nü asayamung lapokba sentong nung Head teacher Kikrunuinuo Liezietsu-i kaketshirtem ajungshi aser education nung saisapong amala co-curricular activity balala koda tongtibang iba indang lemsatepa liasü.

Kasa mapang nung Physical education tesayur Kecubole Kin-i achaayanga asayartem tenangzüktepba agiba sentong agia liasü.

Sports committee ya Keneingusa Rüpreo, Rügüotsolie aser Kecubole Kin nung lenisüba nung inyakyim ajak inyaksangshia liasü, ta kasa sangdong ajanga metetdaksü.

Asayamung nung kaketshirtem Blue, Red, Green aser Yellow ta telok pezü kuma lemsatsü aser asaya balala ya Junior aser Senior category lemsar asaya liasü.

Asayamung nung tetoktepbatem rongnung Football (tebur); Volleyball(tetsür); Skipping; Tug of war; Sack race; Push-ups; Arm Wrestling; Thread & Needle; Face the cookies; Balloon burstings; Coin race; Musical Chairs; Spoon Race;

Sweet bite; 100m race aser 4x100m rally race nung densema liasü.

Asayamung tembangba anogo takok angurtem nem sempet Assistant Head Teacher Vithongunuo-i agüja liasü.

Asayamung nung takok angurtem yamai alitsü:

Volleyball (tetsür)

Champion : Blue House

Runners up: Red House

Football (tebur)

Champion: Green House

Runners up: Yellow House

Tug of war(tebur)

Champion: Red House

Tug of war (tetsür)

Champion : Red House

4x100 rally race (tetsür)

1st- Red House

2nd - Yellow House.

UEFA tir mapa abentsü Aleksander Ceferin tanaben shimogo

New Delhi, Rongchii/April 5 (Agencies): Bodhbarnü Portugal yimtiba Lisbon nung European football's governing body senden ka nung Aleksander Ceferin, tetokteper shinga melei UEFA tir asütsü shimshio go aser pai iba mapa 2027 küm tashi abentsü.

Bodhbarnü tir asütsü shimba sülen Ceferin-i tang agi term tasembuba UEFA tir mapa abentsü. 2016 küm France nung Michel Platini tsükba sülen pa shima liasü.

FIFA tir mapa abentsü atema tetokteper shinga melei Gianni Infantino shimshiba sülen hopta ishika dang lir UEFA Congress-i iba telemtetba agiogo.

"Football asaya koda tebur tajung, iba ajanga asenok koda ajungmesor, fotball asaya ajanga nisung million aika koda jangrademdaksür aser football ajanga koda asenok rasa ashir aji kodanga mamatoktsüla. European football ya takok anguba otsü balaka lir. Iba ya asen lokti microcosm lir," ta arishi küm 55 tain Slovenia nung lawyer yagi UEFA Congress nung o jembiba mapang ashi.

Ceferin-isa, UEFA model ya



Aleksander Ceferin

sporting merit dak amedaka lir ta ashi.

"Asenok globalisation agi kongshio go aser iba dak tajangzük aser takoksa sendaka lir, aser iba ya asenoki mamatoktsüla. Tatidanga ajangshio go aser model tasen tentetsü atema merandangogo, saka parnok ya asenoki kanga meimba European model den meputeper. Asenok modle ya sporting merit dak amendaker lir aser meret atema kecha jenjang mali. Merit ya meshia magitetsü mesüra magizüktetsü, iba ya aatsüla. Iba continenet nung cartel tem atema kecha jenjang mali aser iba ya asenoki jangja jangja metetdaksüogo ta bilemer," ta Ceferin-i ashi.

Ceferin-i tir mapa tanabuba

term abenba mapang European Super League project tasen ka benokba atema rara liasü aser pe lenisüba nung taruba küm nungi Champions League format tasenba benoka asayatsü.

Financial Fair Play temzüng ozüng tasen benoktsü atema sentong yanglur aliba benoka inyaksangshitsü atema pa rangloker inyaksangshitettsü. Iba ozüng tasenba ajanga 2025/26 nungibo asayar aser staff tem taa, transfers aser agent tem taa total revenue shilem 70 dang intokdaksütsü atema club tem azüoktsü.

Ceferin-isa asayartem mezüngmeshiba azüoktsü atema nüngdakba lemsatepa liasü.

"Football asaya ya ajak atema lir. Tia maka nisung kari iba ya mangateti lir aser ibayongji inyakyim bilemshitsüsa akümer.

"Asayartem UEFA tetoktepbamapang mezüngmeshiba azüoktsü atema aibelenertem anema jenjang tapet agitsü asoshi jenjang agitsüla. Asenok asayartem kümzükä ayutsü atema idaki lir," ta pai ashi.

Gavi asayadaksüba atema Elche-i tashishiba benok

Rongchii/April 5, 2023

(Agencies): Barcelona-i Gavi La Liga nung first-team asayar ama mezüngoksemetetba atema parnok mepetmesüi iogo. Elche club shirnok Barcelona-i Deobarnü koka liasü parnok ashiba agi, iba asaya nung gavi asayadakja parnok temzüng ozüng kar raksaogo. Cadena COPE radio station indang Tiempo de Juego program ajanga ashiba agi, Gavi indang license magi kümdaksüogo anungji pa Deobarnü asayatsü temsüa maliasü ta Elche puri amanger.

Elche-i, Barcelona anema Royal Spanish Football Federation (RFEF) Competition Committee nem tashishiba ka agütsüogo.

Iba tashishiba ya RFEF article 141 dak ajemdaker lir, koba ajanga asayar ka license thitsüba sülen kasa season nung asayatsü memelar.

Gavi-i 2022 küm September ita Barcelona den tenangzüktepba ka yangluogo aser 2026 tashi Barca nungi asayatsü. Iba tenangzüktepba yangluba sülen pa nem Barca manager Xavi Hernandez asaya aliba mapang asema jersey No. 6 agüja liasü. Ajisüaka pa den tenangzüktepba

tasen yangluba ya Barcelona puri La Liga nung mezüngoksemetet, kechiyong parnok league-i atakzükja tokja aliba asayartem taa dang nungi tali agüjatoker lir.


Iba tetezü Gavi ya ano youth-team asayar ka dang lir, anungji Elche puri pa Deobarnü asayadaksüba atema ashishir. Midfield nung asayasang ya B-team nungi first-team asayar akümba sülen ano tanaben B-team-i meyipa yokba ajanga mangmangteper.

Ajisüaka osang ajanga ashiba agi, Elche-i tashishiba agütsüba ya RFEF aser La Liga napronglai magizüker. League aser federation-i ashiba agi, Deobarnü asaya nung Gavi asayadaksüba ya shidak dang.

"Onok aser RFEF atemabo ajak shidak dang lir. Gavi dang züngoksema aliba yimya ya tekümdaksü memetdaksü tsüngda taoba mapang amadang lir," ta La Liga-i ashi.

Deobarnü asaya nung Barcelona-i goal 4-0 agi Elche madak takok ngua liasü. Asaya nung Robert Lewandowski-i goal ana aser Ansu Fati o Ferran Torres nati goal kaka idakja liasü. Asaya nung Gavi-ia assist tajung ka süja liasü.

IPL 2023: KKR-i sen crore 2.8 agi Jason Roy alizükogo



Jason Roy

masayatetsüsa aküm.

Roy, Brestostibarnü kidang KKR pur Royal Challengers Bangalore (RCB) pur den asayatsü aliba asaya nung shilem magitetsü, ajisaka pa April 9 nü Ahmedabad nung Gujarat Titans pur den asayatsü aliba asaya nungbo asayatetsü.

Roy, shiba mezüngbuba 2017 küm IPL nung Gujarat Lions nungi asaya liasü, pa IPL nung tatamsa 2021 season nung Sunrisers Hyderabad nungi asayaogo.

2021 küm pai asaya pongu nung run 150 yanglu, kong half century ka yangluba densema lir.

Arishi küm 32 tain asayar ya England team nungi T20I asaya 64 nung asayaogo aser iba mapang pai strike-rate 137.61 nung run 1,522 yanglua lir. Paisa half century ti yanglua liasü.

Roy-i, Afghanistan nung wicket keeper - batter Rahmanullah Gurbaz melentsü imlar, shiba Punjab Kings den asayaba mapang opener ama asaya aser ball 16 nung run 22 yanglua liasü. KKR pur rongnungi wicket keeper N Jagadeesan lir anungji Gurbaz masayashitsü akok.

New Delhi, Rongchii/April 5 (Agencies): Captain Shreyas Iyer yiruba aser Bangladesh nung allrounder Shakib Al Hasan asayamung nung shilem magitsü telemtetba agiba sülen Kolkata Knight Riders (KKR)-i Bodhbarnü England nung opener Jason Roy anisemogo.

"Kolkata Knight Riders-i England nung asayar Jason Roy TATA IPL 2023 atema pa indang base price sen crore 1.5 aliba nungi sen crore 2.8 agi alizükogo," ta KKR-i Bodhbarnü sangdong ka ajanga metetdaksü.

IPL anaben tashi koker aliba team ya captain Iyer teberem yirua asayamung nung masayatetsüsa akümba ajanga kanga akoksa aser iba den Shakib-a pa jurila maparen kar aliba aser linük team nungi asayatsüsa akümba ajanga

BILEMDANGANG

"Temulung temerük agi taküm ain adokdaksür."